

Kralendijk, Boneiru, 21 di ougùstùs 2026

Na Presidente di Konseho Insular di Boneiru

Sr. J. Soliano

Mediante Grifir di Konseho Insular

Plasa Wilhelmina

Presente

Tokante: Yamada motivá pa konvoká un reunion ekstra di Konsehu Insular riba base di artíkulo 13 di Reglamento di Òrdu, tokante e subidanan drástiko den preis di elektrisidat na Boneiru

Apresiabel sr. Presidente,

Firmantenan, frakshon MPB i frakshon Serberie, ta dirigí nos na bo persona ku e *petishon motivá pa*, riba base di artíkulo 13 di e Reglamento di Òrdu di Konsehu Insular, konvoká *den e tempu mas kòrtiku* posibel un reunion èkstra di konseho insular. Motibu pa esaki ta e subidanan drástiko i *konsekutibo den preis di elektrisidat na Boneiru*, kualnan ta afektá direktamente e seguridat di *eksistencia di famianan i e kontinuidat di komersio lokal*.

1. Motivashon

E frakshonnan firmante ta konstatá ku e preis di kosto pa elektrisidat pa e habitantenan i empresarionan di Boneiru, den un periodo di algu mas ku mei aña, dos baiha a subi fuertemente ku un efekto akumulativo ku mester wòrdu konsiderá komo drástiko:

- Riba 1 di yanüari 2026, Outoridat Konsumidó i Merkado (ACM) a subi e tarifanan máksimo pa elektrisidat na Boneiru. E tarifa variabel di uso a subi di mas o menos USD 0,3220 pa USD 0,3868 pa kWh, i e tarifa Pagabon (prepagó) di mas o menos USD 0,4492 pa USD 0,6062 pa kWh, miéntras ku e tarifa fiho di uso tambe a subi ku aproksimadamente 6%.
- Riba 1 di yüli 2026, e tarifa variabel di elektrisidat di WEB a wòrdu subí fuertemente atrobe, di USD 0,3868 pa USD 0,5021 pa kWh, komo resultado di preisnan mas haltu di diesel relashoná ku e konflikto entre Estados Unidos i Iran. Pa klientenan di Pagabon e tarifa a subi di USD 0,6062 pa USD 0,6642 pa kWh, un subida di kasi 10% ariba di e subida anterior.
- Aunke e tarifa fiho mensual a wòrdu rebahá ku mas o menos 25% riba 1 di yüli 2026, e rebahamentu aki no ta kompensá, ni serka, e subida di e tarifa variabel pa famianan ku un konsumo promedio te ariba promedio, siendo ku e tarifa variabel ta determiná e mayoria di e faktura final.
- E parti ku WEB i e produktor ContourGlobal Bonaire mes tin kontrol riba dje ta limitá na mas o menos 32% di e tarifa; e restante 68% ta ligá na e preis mundial di krudo. Esaki ta enfatisá e vulnerabilidat struktural di Boneiru pa shòknan di preis eksterno, mientras ku e suministro di energia ta sigui ser basá mayoritariamente riba kombustibel fósil.

- E subidanan konsekutibo ta afektá famianan ku, generalmente, ya tin un entrada disponibel limitá, di un manera desproporshonalmente pisá, ta subi e preis di kosto pa e komersio lokal, i asina ta forma un riesgo pa e poder di kompra, e seguridat di eksistensia i e klima di inversion riba e isla.

Segun pensamentu di e frakshonnan firmante, e magnitud, e sekuensia i e karakter struktural di e subidanan aki di preis ta hustifiká ku konsehu insular mas pronto ku ta posibel den reunion, deliberá riba e tema, ku e meta di pidi kolegio ehekutivo rindi kuenta tokante e pasonan tumá te awor, i determiná kua akshon adishonal ta nesesario dor di e entidat públiko di Boneiru, i e ministerionan enkargá i ACM.

2. Petishon

Riba base di loke a wòrdu ekspresá ariba, frakshon MPB i frakshon Serberie ta pidi bo persona:

1. konvoká, den plaso mas kòrtiku ku ta posibel i konforme artíkulo 13 di Reglamento di Òrdu, un reunion ekstra di konsehu insular;
2. pone riba e agenda di e reunion aki e tópiko “e subidanan drástiko den preis di elektrisidat na Boneiru i e konsekuensianan pa habitante i empresario”;
3. pidi kolegio pa, promé ku e reunion, duna informashon por eskrito tokante e pasonan ku a wòrdu tumá te awor i esnan planiá, dor di e entidat públiko di Boneiru, e ministerionan enkargá na Hulanda i ACM, ku meta di moderá òf kompensá e subidanan di tarifa;
4. den e mesun reunion, duna oportunitat pa entregá moshon i/òf otro instrumento ku konseho Insular tin na disposishon, pa asina duna kolegio ehekutivo un enkargo kla.

Nos ta konfia i ta sigur ku bo persona, tumando na kuenta e urgensia i e impakto sosial di e tópiko aki, lo trata e petishon aki ku e urgensia rekerí, i lo konvoká e reunion mas pronto ku ta posibel i konforme Reglamento di Òrdu.


Atentamente,

Na nòmber di frakshon MPB,



Hennyson Thielman
Lider di frakshon

Na nòmber di frakshon Serberie,



Salma Serberie
Lider di frakshon